

يَا أَيُّهَا الَّذِينَ آمَنُوا اسْتَعِينُوا بِالصَّبْرِ وَالصَّلَاةِ إِنَّ اللَّهَ مَعَ
الصَّابِرِينَ ﴿١٥٣﴾

“Wahai orang-orang yang beriman, dan mintalah pertolongan (kepada Allah) dengan sabar dan solat, sesungguhnya Allah bersama orang-orang yang sabar.”

(Surah *Al-Baqarah*, ayat 153)

Pada saat kita sedang ada masalah dan berdepan kesukaran, sudahkah kita melakukan apa yang seharusnya kita lakukan seperti yang terkandung dalam ayat itu? Sudahkah kita beriman, mengerjakan solat, dan sabar pada rentetan masalah yang menimpa kehidupan kita? Barangkali beban terasa begitu berat, masalah terasa begitu besar adalah kerana kita menghadapinya dengan tidak redha, tidak ikhlas, tidak sabar, tidak beriman.

Apabila kita beriman, pasti kita faham yang segala kesukaran dan masalah hadir adalah bagi memberikan kita banyak pembelajaran dan pengalaman, membuatkan kita hebat, membuatkan kita jadi kuat, teguh, tahan dihentam, tidak lemah, tidak lembik, tidak goyah.

Apabila kita beriman, kita akan sedar yang ujian ini tidak akan selama-lamanya, Allah akan akhiri semuanya. Allah akan angkat darjat kita, Allah sedang memuliakan kita, Allah sedang menilai sejauh mana keimanan kita, sejauh mana kekuatan kita.